



## SIARAN AKHBAR

### KAJI SELIDIK BAGI INDEKS SENTIMEN PERNIAGAAN (*BUSINESS SENTIMENT INDEX*)

---

1. Autoriti Monetari Brunei Darussalam (AMBD) akan menjalankan kaji selidik ke atas perniagaan-perniagaan yang terpilih untuk meninjau Indeks Sentimen Perniagaan (*Business Sentiment Index*, BSI) mulai hari Sabtu, 1 Ogos 2020.
2. Perniagaan-perniagaan yang terpilih akan dihubungi oleh kakitangan AMBD untuk menetapkan tarikh bagi temu bual tersebut. Untuk memastikan kesihatan dan keselamatan mereka yang terlibat dalam temu bual ini, langkah berjaga-jaga terhadap wabak COVID19 akan diambil berdasarkan garis panduan yang telah dikeluarkan oleh Kementerian Kesihatan.
3. Temu bual tersebut akan dijalankan oleh kakitangan AMBD yang akan memperkenalkan diri sebelum sesi temu bual dimulakan. Kaji selidik ini dijangka akan dilaksanakan secara berterusan pada setiap bulan.
4. BSI yang akan diterbitkan secara bulanan ini, bertujuan untuk mengukur tahap sentimen atau keyakinan perniagaan-perniagaan di Negara Brunei Darussalam. Sebanyak lebih 600 perniagaan daripada pelbagai sektor di Negara Brunei Darussalam telah dipilih untuk mengambil bahagian dalam kaji selidik ini.
5. Soalan-soalan yang akan diajukan adalah berkaitan dengan keadaan semasa dan jangkaan bagi iklim perniagaan, pelaburan, jumlah pekerja, serta kos untuk menjalankan perniagaan. Tiada maklumat peribadi akan ditanya selain daripada nama dan maklumat untuk menghubungi responden dan sebarang maklumat yang dikongsikan adalah sulit.
6. Memantau tahap keyakinan perniagaan adalah penting mengambilkira ianya adalah salah satu petunjuk utama bagi iklim perniagaan dan tahap keadaan ekonomi bagi sesebuah negara secara amnya. Keyakinan para peniaga merupakan satu elemen penting bagi jangkaan pertumbuhan perniagaan dan pelaburan, di samping peningkatan peluang pekerjaan. BSI akan memberikan maklumat tambahan yang bermanfaat mengenai keadaan ekonomi Negara Brunei Darussalam dari perspektif para peniaga di negara ini. Maklumat yang dikumpul secara berterusan ini juga akan dapat membantu para penggubal dasar untuk menghasilkan dasar-dasar yang tertentu ke arah pembangunan ekonomi.
7. Bagi maklumat lanjut mengenai BSI dan soalan-soalan yang akan diajukan kepada para perniagaan, sila layari laman sesawang AMBD di [www.ambd.gov.bn](http://www.ambd.gov.bn). Para responden yang ingin mengesahkan seseorang penemu bual boleh menghubungi AMBD di talian 2382262.

#### **Autoriti Monetari Brunei Darussalam**

Tarikh: 25 Zulkaedah 1441H / 17 Julai 2020M

Rujukan: AMBD/COMMS/3